

Imaatigut ajunaarnernik, isumannaallisaanermik misissuinerit pillugit inatsimmik Kalaallit Nunaannut atuutilersitsinissaq pillugu peqqussummik, Namminersorlutik Oqartussat akuersissuteqarnissaannik Inatsisartut aalajangiiffigisassaattut siunnersuut

(Isumaginninnermut, Suliffeqarnermut, Ineqarnermut, Attaveqaasersuutitut, Isorliunerusunullu Naalakkersuisoq)

Saqqummiussissut

Siullermeernera

Naalakkersuisut sinnerlugit imaani ajutoortoqartillugu isumannaallisaanermik misissuisarneq pillugu inatsit naapertorlugu Kalaallit Nunaannut peqqussutissamut Namminersorlutik Oqartussat atuutilersitsinissaannut Inatsisartut aalajangiiffigisassaattut siunnersuut manna saqqummiunneqarpoq.

Siunnersuummi danskit kalaallillu maleruagassatigut tunngaviisa imminnut naleqqussarnissaat, taamaalillunilu pillaaarnermut/taarsiisarnermut inatsisit naapertorlugit suliamik ingerlatsisarnerup aamma Imaani Ajutoornerit pillugit Ataatsimiititaliap ajutoornernik misissuisarnerisa, kiisalu imaani isumannaallisaanermut tunngatillugu suliaassarfiit attuumassuteqarsinnaasut allat akornanni avissaartitsisoqarnissaa siunertarineqarpoq.

Ataatsimiititaliaq inatsisitigut tunngavissaqannginnini peqqutigalugu akuusut isertuussinissamik neqeroorfiginagit misissuinerinik ingerlatsisariaqartarsimavoq. Tamanna misissuinerit pitsaassusaannut pingaaruteqarpoq, aammalu nunani allani ajutoornerit pillugit ataatsimiititalianik suleqateqarnissamut ajornakusoortitsisarluni.

Tamatuma saniatigut Imaani Ajutoornerit pillugit Ataatsimiititaliaq kalaallit maleruagassanut tunngavigisaannik atuisarnermini misissueriaatsinik nutaaliaasunik, misissuinerup qaffasissumik pitsaassuseqarnissaanik qulakkeerisussanik atuisinnaanngilaq.

Imaani Ajutoornerit pillugit Ataatsimiititaliap 2021-mili maleruagassat marluiit taakku akunnerminni naapertuuttunngorsarneqarnissaannik ujartuisimavoq, aammalu Naalakkersuisut ataatsimiititaliaq suleqatigalugu inatsisip Kalaallit Nunaannut pissutsinut naleqqussarneqarnissaa sulissutigisimavaat.

Taamatut oqaaseqarlunga Naalakkersuisut sinnerlugit immikkoortoq Inatsisartuni kajumittumik suliaanngorlugu tunniuppara.